

01.Juli.2019

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Inuussutissarsiutigalugu aalisarnikkut angallateeqqanik kvoteqartussanik minnerpaaffiliinissami takissuseq 9 meter aallaavigalugu pitsaaqutinik ajoqutinillu nassuiaateqaqqullugit ukiuni 12 ikaarsaariarfeqartillugit Naalakkersuisut nalunaarusioqqullugit peqquneqarnissaanik Inatsisartut aalajangiiffigisassaattut siunnersuut.

(Inatsisartuni ilaasortaq, Henrik Fleischer, Siumut)

Tungavilersuineq:

Silaannaap allanngoriartornerata aammalu piniartuunermiik aalisartuunermut nuukkiartornerup kingunerisaanik isumannaannerusumik sulliveqarnerusumillu aammalu pinngortitap nukkiut akiuussinnaanerusumik sulliveqartitsilernissaq avaqqunneqarsinnaanngilaq, aamma isumannaallisaaneq eqqarsaatigalugu.

Tassami naluneqanngitsutut silaannaap alanngornerata kingunerisaanik immap atugassarititai sakkortusiartuinnarput, aammalumi ajoraluartumik ilaatigut imaani ajunaarnerit pisarlutik. Tassa qularnanngitsumik angissutsinik naleqqutinngitsunik killilersuivallaarnerup aammalu atuivallaarnerup tamatuminnga kinguneqartitsisinnaasarsimasinnaalluni. Tassami ilaatigut takuneqartarput umiatsiaaqqat mikisut inuussutissarsiornissamut akuerisaanngitsut aalisarnermi atorineqartut ilaat pukkitsuararsuullutik tikilersut.

Oqaatigineqartut tungavigalugit imarsiornermi aqutsiveqarfiup takissutsinut isumannaallisaanermullu aaliangersagai paasinniffigilluarneqarlutik tamanik malinneqarnissaat innersuullugit atuutsilillaqqunaqaat.

Iluaqutaassagalarpoq piffisamik ikaarsaarfiusussamik, soorlu ukiut 12-it atorlugit, eqqartuussinikkut kingunerisassaasinnaasut eqqarsaatigalugit iluaqutaassagalarpoq. Ikaarsaarfissaq ukiunut 12-nut inissikkaanni, nalikilliliinissamut malittarisassat periarfissinneqassapput, aalisartullu periarfissinneqassallutik angallammik nutaamik pisaarniarnerminni inuutissarsiutitigut siuarsaanissamik tapiiffigitissinnaassallutik. Tamatumap saniatigut aamma aalisarnermi soqutigisaqaqatigiit periarfissinneqarluassammata ungasinnerusoq

eqqarsaatigalugu pilersaarusiornissamut, soorlulusooq ileqqaarinikkut aningaasat nammineq pigisariaqakkat eqqarsaatigalugit.

Minnerpaaffissatut takissusissaq 9 meteriusoq inuussutissarsiutigalugu aalisarnermi atuutilernergigut aamma aalisarnikkut pisinnaasavut annertusissapput. Naalackersuisut tamanna pillugu nassuiaateqalerpata aamma peqquneqarput tassunga tunngasumik nassuiaateqaqqullugit.

Aningaasatigut allaffissornikkullu pisortanut kingunerisassai:

Nassuiaateqarnissamik suliaq missingersorneqarpoq AC-erimik ukiup affaani naammassiniarneqarsinnaasoq, tamannalu 250.000 kr. missaanni naleqassangatinneqarpoq.

Namminersorluni inuussutissarsiuteqarnermut aningaasatigut allaffissornikkullu kingunerisassat:

Soqanngilaq

Innuttaasunut aningaasatigut allaffissornikkullu kingunerisassat:

Soqanngilaq